

vero refert, an aqua, vinum &c. res sensibiles, aut elementa, aut materia Sacramenti dicantur? Interestne, verborum nexum a J. C. institutum, verba nuncupari aut formam? Nugæ sunt istæ pædagogorum, non Theologorum propriæ. Jam ad res majoris momenti veniamus.

§. II. Res ipsas sensibiles & verba, seu materiam & formam, ut loquuntur Theologi, ex Divina institutione ad unumquodque Sacramentum constituendum requirit Ecclesia, unde *Florentini Patres*, „ Sacramenta omnia, *inquiunt*, rebus „ tamquam materia, & verbis tamquam forma perficiuntur: quam definitionem Verbo Dei satis conformem ex dictis quæst. 1. c. 3. §. 3. abunde constat. Hæreses tamen hic oppositas habemus. *Pauliciani*, ex una parte, teste *Euthymio P. II. Panopliæ tit. 21.* omnem materiam a Sacramentis eliminarunt, arbitrati, Sacramenti virtutem verbis tantum inesse; ex altera vero parte *Lutherani & Calvinistæ* virtutem omnem Sacramentorum in materia reponendam volunt, aut fere nulla verborum seu formæ habita ratione. *Lutherus ipse*, circa Sacramentorum formam, *Gnosticorum & Cataphrygum* errorem renovavit, arbitratus, quamlibet essentialem mutationem formæ Sacramenti validitati non obstare. En audacissimi hominis verba *l. de Capt. Bab. c. de Baptismo*, „ Quo- „ cumque modo tradatur Baptismus, modo non in nomine „ hominis, sed in nomine Domini tradatur, vere salvum facit; immo non dubitem, si quis in nomine Domini suscipiat, etiam si impius Minister non det in nomine Domini, vere baptizatus esset in nomine Domini. Itaque, „ subdit *Venerabilis Bellarminus*, itaque si quis dicat: ego „ te baptizo in nomine Lutheri, vel in nomine Catharinæ „ uxoris ejus, vel etiam in nomine Diaboli, erit verus baptizatus, modo qui suscipit accipiat in nomine Domini. Hactenus *Bellarminus*.

§. III. Ceterum Catholica Ecclesia docet, verba, quæ Sacramentorum formam constituunt, consecratoria esse debere. hoc est, a J. C. Ministro prolata in persona ejusdem J. Christi Domini nostri, cum intentione vere consecrandi, vere baptizandi &c. quæ verba, ut loquitur *Esius in IV. Sent.*